

## Berita-berita Dari Dunia Islam

Pasukan pemuda-pemuda Islam Pakistan tidak akan mengambil bahagian di dalam merebut Kejohanan Bola Sepak Pemuda-pemuda Asia yang Kedelapan yang akan diadakan dalam bulan April hadapan di Filipina kerana pasukan Israel akan mengambil bahagian di dalamnya. Pada tahun dahulu juga Pakistan tidak mengambil bahagian dengan sebab yang demikian juga. Pakistan tidak mahu mengambil bahagian di dalam mesyuarat-mesyuarat Pertubuhan Bola Sepak Asia dengan adanya Israel.

\* \* \*

Pada 14 Februari yang lalu kerajaan Suria telah membantah langkah-langkah Amerika Syarikat menghantar senjata-senjata baru ke Israel. Surat-surat bantahan dari Kementerian Luar Suria telah disampaikan kepada Duta Amerika di Damaskus.

Amir Kuwait Shaykh Sabah al-Salim al-Sabah telah melawat kerajaan ‘Arabiyyah Sa‘udiyyah dan telah balik semula pada 12 Februari ke Kuwait. Amir Kuwait ini telah berunding dengan *al-Malik* Faisal dan mengambil umrah di Mekah. Setibanya di Kuwait baginda telah mengatakan bahawa lawatan itu adalah menguatkan lagi persahabatan yang lama di antara kedua negeri itu. Di dalam kenyataan bersama kedua-dua Raja Arab itu menyatakan bahawa mereka berdiri teguh menyokong keputusan persidangan seluruh negara Arab terutamanya menyokong umat Islam di Palestin dan membantu negara-negara Islam dan negara sahabat yang bersedia membebaskan Palestin “yang telah dicuri” dari dunia Arab.

\* \* \*

Perikatan persahabatan Saudi-Iran telah ditubuhkan di Tehran kerana menguatkan lagi hubungan persaudaraan dan persatuan di antara penduduk-penduduk kedua negara itu. Yang Dipertua bagi pertubuhan ini ialah

Perdana Menteri Abbas Hoveida. Lain-lain ahli termasuk senator-senator Iran, dua orang pemangku Yang Dipertua iaitu duta Iran di ‘Arabiyyah Sa‘udiyyah dan duta Saudi di Iran.

\* \* \*

*Jalālah al-Malik al-Mu‘azzam* Faisal bin Abdulaziz Al-al-Sa‘ūd akan melawat ke Sudan tahun ini, demikian dinyatakan oleh Radio Home Dormant yang mengambil berita itu dari Duta ‘Arabiyyah Sa‘udiyyah di Khartoum. Banyak pimpinan-pimpinan Sudan yang menyatakan mereka akan mengambil bahagian di dalam persidangan Islam yang akan diadakan di Mekah pada akhir tahun ini di bawah riayah *al-Malik* Faisal.

\* \* \*

Turki dan Republik Somali telah mengambil keputusan akan mengadakan hubungan diplomat di dalam taraf duta – demikian dinyatakan oleh jurucakap Kementerian Turki di Ankara pada 9 Februari yang lalu.

\* \* \*

*Al-Malik* Faisal, pada 22 Februari dalam lawatannya menjumpai *al-Malik* Hussein di Jordan telah mengeluarkan satu kenyataan bersama menyeru semua kerajaan Arab menguatkan lagi persahabatan dan perhubungan mereka dengan negara-negara Islam kerana faedah negara-negara Arab. Adalah dianjurkan dan digalakkan persahabatan “negara sahabat” bagi meminta sokongan bagi negara-negara Arab menentang “musuh bersama mereka” – Israel. Mereka meminta negara-negara menyokong Jordan – sebagai barisan hadapan dalam pertahanan daripada keganasan dan perkembangan Zionis (Yahudi).

\* \* \*

262,000 orang Arab Palestin masih tinggal di Palestin. Kebanyakan mereka duduk di Galilee, Triangle

dan Negev. Semenjak terbentuknya negara Israel-Israel pihak berkuasa Israel telah meletakkan daerah-daerah itu di bawah kekuasaan tentera. Di bawah kekuasaan tentera ini orang-orang Arab penduduk negeri itu telah hilang kebebasannya dan telah tidak dibenarkan berpindah dan memberi fikiran.

Gabenor tentera mengambil kekuasaan pertadbiran dengan menahan orang di dalam tahanan dan menghukum orang dengan hukum membuang negeri. Mereka mengharamkan pertadbiran bagi hal ehwal orang-orang Arab bahkan mereka mengganggu hal ehwal perseorangan penduduk. Pemerintahan tentera di sini telah membuat undang-undang: (1) Merampas tanah-tanah orang-orang Arab, (2) mengambil kebebasan mereka dan menghapuskan kebudayaan Arab dan merendahkan taraf orang-orang Arab dan (3) memaksa penduduk-penduduk kecil Arab mengundi sebagaimana yang diarahkan. Pihak berkuasa Israel berpendapat bahawa undang-undang tentera mustahak bagi keselamatan Israel. Mereka menggunakan akhbar dan menghebahkan dakyah bagi melukiskan orang-orang Arab sebagai sayap yang kelima. Di dalam pada itu Pertubuhan Bangsa-bangsa Bersatu tidak mengambil endah bagi menyiasat dan mengetahui puak-puak kecil Arab di Israel. Dalam pada itu berjuta-juta orang-orang Palestin yang dihalau dari negeri itu dan tinggal di khemah orang-orang pelarian iaitu anak negeri yang telah menderita hidupnya di bumi mereka.

\* \* \*

*Al-Malik* Faisal telah dijemput dengan rasminya melawat ke Spain. Jemputan itu disampaikan oleh Menteri Perindustrian kerajaan Spain yang sedang melawat ke kerajaan ‘Arabiyyah Sa‘udiyyah bagi merundingkan perkembangan ekonomi di antara kedua negeri itu.

\* \* \*

Jurubicara kerajaan Turki Tuan Sihad Baljahan tatkala mengulas kenyataan Menteri Luar Cyprus terhadap kepada tentera-tentera Turki di Cyprus yang dikatakannya haram itu telah menyatakan: “Tentera-tentera Turki yang ada di Cyprus itu

alah mengikut perjanjian yang sah dan telah diterima oleh Pertubuhan Bangsa-bangsa. Apa jua akan jadi kita akan mempertahankan hak Turki yang termaktub di dalam perjanjian itu.”

Ia menolak pengakuan Makarios (Perdana Menteri Cyprus) bahawa keputusan Lembaga Bangsa-bangsa pada bulan November yang lalu membatalkan ikatan Zurich dan London dan satu-satu persetujuan buat Cyprus termasuk di dalam Enosis (persatuan dengan Greek) adalah tidak diterima. Jurubicara Turki itu menyatakan keputusan Lembaga Bangsa-bangsa itu menetapkan kemerdekaan Cyprus yang sama sekali tidak meluluskan persatuannya dengan Enosis.

\* \* \*

Menurut Mahmud Abdul Salam Madsen dari Denmark berkenaan dengan orang-orang Islam di Scandinavia menyatakan:

Di Denmark ada lebih kurang 70 orang Islam Denmark dan ada lebih kurang 500 orang Islam dari lain-lain negeri.

Di Sweden ada lebih kurang 30 orang Muslimin Swedish dan lebih kurang 600 orang Turki Islam di Stockholm. Perkembangan Islam di dalam Denmark adalah dengan usaha dakwah Islam yang dijalankan oleh Syed Kamal Yusuf yang tiba ke sana dalam tahun 1956 dan telah menjajah beberapa bandar sesudah masa itu. Di dalam bulan April mereka berharap akan mula membangunkan masjid di Copenhagen. Mereka telah ada mempunyai sebidang tanah yang baik dan rancangan-rancangan telah hampir disempurnakan dan wang-wang yang dipungut serta yang telah diterima dimasukkan di dalam Bank Denmark secepat mungkin. Semenjak tahun 1961 diadakan perjumpaan tiap-tiap minggu. Pada tahun ini mereka telah menghantar 5 orang wakil mereka ke Persidangan Eropah di London.